

L'AN NÒU

La chourmo de Prouvènço d'aro vous souvèton uno bono annado, emé toujour nosto lengo en bouco...



Prouvènço d'aro

Tóuti li mes, lou journau de la Prouvènço d'aro


Janvié 2014

n° 295

2,10 €

Calèndo

Lou Palais dóu Roure d'Avignoun rènd un óumage forço óuriginau au grand pouèto, Mas-Felipe Delavouët, despareigu en 1990 e que soun obro s'iscriéu dins la lignado de Frederi Mistral. Emai siegue pas lou sujèt centrau de l'espousicioun, es la proumièro fes qu'Avignoun duerb si porto au pouèto que sa vido s'escoulè à Grans, dins sa bastido dóu Bayle-Vert. Lou souvèt dis ourganisairre d'aquelo espousicioun que soun iniciativo revèn à l'assouciacioun À l'asard Bautezar! es esta de tenta uno proumièro aprocho d'aquelo obro pouëtico eicepciounalo. L'espousicioun presènto lou travai grafi



que Mas-Felipe Delavouët coumpausavo e realisavo pèr si proche, sis ami, si fidèu, de carto de vot bagnado d'imour, de frescour, de joio ounte se coustejon Rèi mage e bergié, Santo Famiho e païsan coume autant de persounage emblematic au sèn d'un prouducioun d'uno granda varieta.

Aquéu pouèto prouvençau qu'enventè soun propre caratèrre pèr l'edicioun rafinado de sis obro, mostro aqui un aspèt de sa persounalita qu'encanto si legèire e ramento que la Prouvènço es toujour estado uno terro d'inspiracioun.

Lou catalogue de l'espousicioun *Calèndo* presènto aquéli carto pèr Calèndo realisado pèr Mas-Felipe Delavouët emé tambèn d'ùni de si pouèmo. Tout acò acoumpagna d'esplico judiciouso, que siegue pèr Silvéstre Clap, lou Counservadou, Jan Rouy lou presidènt de "À l'asard Bautezar!" o Glaude Mauron, lou proufessour de lengo e literaturo prouvençalo à l'Universita de z-Ais-Marsiho. L'espousicioun se tèn enjusqu'au 11 de janvié. Lou catalogue costo 15 eurò + 5 eurò de port devers l'assouciacioun "À l'asard Bautezar!", 37, rue de la poste 30150 Monfaucon.

Coume en l'an 14



" Calandreta "

30 an de creacioun pedagogico

L'escolo bilengo, à l'óucasioun d'aquest anniversari, vèn de sourti un grand e bèu libre, sus l'istòri di Calandreta, emé de testimòni (raconte, analiso, article de prèssò, comentari) en francés, en parla de l'endrè ounte se trobon lis escolo), de parènt, d'ensigneire jouine e ancian, de calandroun devengu grand o devengu ensigneire, de fourmatour e subre-tout un mouloun de fotò, qu'en virant li pajo es coume regarda un bèl album de famiho: li pichot à l'escolo, en estàgi, en classo verdo, lis ensigneire en reünion de travai, dins la classo, au carnavau, que d'enfant urous... valènt-à-dire tout ço que represènto *Calandreta*: bilinguisme, coungrès, descuberto, fèsto, vido assouciativo e vido vidanto. *30 an, es l'escasènço d'uno visto plus larjo sus lou camin fach*

e tambèn de faire uno pauseto refleissivo pèr pensa l'avenidou. L'avenidou de Calandreta bèn segur, mai tambèn de la lengo e de la cultura nostro (J.-Louis Blenet, presidènt de la Counfederacioun dis escolo laïco Calandreta) 30 an, tant de causo à racounta, es adounc 30 an de vido partejado.

Ce qu'on appelle le patois est relevé et comme magnifié. Il serait facile aux éducateurs, aux maîtres de nos écoles de montrer comment aux XIIe et XIIIe siècles, le dialecte du Midi était un noble langage de courtoisie, de poésie et d'art (Jean Jaurès, 1911). Li Calandreta an 30 an, un gros vouleme de 370 pajo, en grand fourmat 22x26, emé de bèu papié glaça, es en vèndo pèr 18 eurò, mai es miès de lou trouba en librarié qu'es tras que lour e lou port sarié mai carivènd que lou libras. www.calandretas.org.

T. D.

Proumièro TV en lengo nostro

La cadeno Òc tele a coumença de difusa dins noste parla.

Pajo 12

Lou coulòqui de Marsiho

Un fube de mounde pèr "l'óucitan en Prouvènço-Aup-costò d'Azur".

Pajo 7

Lis Oustensioun à l'UNESCO

Li relicle dóu Lemousin au patrimòni inmateriau de l'umanita...

Pajo 3